

Inatsisartut Suleriaasianni § 33, imm. 3. nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 1/2010-mik, ataani allasimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

**Kisimiillutik pilersuisut atugaasa pitsanngorsarneqarnissaannut taperseeqqullugit Savalimmiuni Naalakkersuisut, Kalaallit Nunaanni Namminersorlutik Oqartussat aamma Islandimi Naalakkersuisut Nunat Avannarliit Killit Siunnersuisoqatigiiffiannit kaammattorneqarput. Ilaatigut isumassarsianik, ilisimasanik aamma misilittakkanik paarlaasseqatigiinnikkut aammalu ilaqtariit kisimiittunik pilersuisullit atugaasa qanoq pitsaanerpaamik pitsanngorsarneqarsinnaanerannik siunnersuutunik saqqummiussinikkut naalakkersuisut pineqartut suleqataanissaat siunnersuisoqatigiit kaammattuutigaat. Alloriarnertut siullertut nunani avannarlerni killerni isumagininnikkut naalakkersuisuusut isummanik iluatsittumillu suliniutinik paarlaasseqatigiiffiusumik ataatsimeersuartitsinissamik kaammattorneqarput.**

#### Nassuiaat

Nunani avannarlerni killerni kisimiillutik pilersuisut amerliartorput. Tamanna amerlasuutigut imaannaanngitsunik qaangerniagassartaqartarpoq. Savalimmiuni kisimiillutik pilersuisut akornanni misissuinerup takutippaa meeqqat arlaqartut piitsutut alliertortut.

Qaangerniagassat ilaat makkuupput:

- Meeqqat piitsutut alliertortut
- Inuiaqatigiit ima aqqissugaapput ilaqtariit aningaasaqarnertik attassinnaajumallugu marlunnik isertitaqartariaqarlutik.
- Ilinniartitaaneq ima aqqissugaavoq (Savalimmiuni) kisimiilluni pilersuisutut ilinniarnissaq pisariulluni amerlasuunillu ingerlanneqarsinnaanani.
- Kisimiillutik pilersuisuusut amerlasuutigut tassaapput anaanaasut. Savalimmiuni maanna arnat angutinit 2000-inik ikinnerupput. Tamatumunnga pissutaasut soorunami arlaliupput. Naatsorsuutigineqarpoq arnat kisimiittut ilaasa amerlasuut aningaasaqarnerminnik attassisinnaannginnertik pissutigalugu Savalimmiut qimattariaqarsimagaat. Tamanna amerlasuunut annertuumik annaasaqaataasinnaavoq. Meeqqat ataaminnik, aanakkuminnik aatakkuminnillu qanigisaminnillu allanik akuttunngitsumik takunninnissaminnut pisuni arlalinni periarfissaaruttarput. Tamanna annertuumik annaasaqaataavoq. Nalunngilarput arnat nunagisartik sivilunerujartuinnartumik qimassimagaangassuk uteqqinnissaat ilimanarunnaariartortartoq. Anaanaasullu nunaminnut utinngippata meeqqat uteqqinnissaat suli ilimanannginnerulersarpoq.

Taamaattumillu nunat avannarliit killiit isumassarsianik iluatsiffiusumillu suliniutinik avitseqatigiinnissaat aammalu ilaqtariit kisimiillutik pilersuisullit atugaannik qanoq pitsanngorsaasinnaanerput pillugu siunnersuutunik saqqummiussinissaq pingaaruteqarlunilu isumalipilussuavoq.